

元史新編

元史卷十九

列傳五

中統以後屢朝平服叛藩

東方叛王

乃顏哈丹

太祖封四弟別里古台於斡難河

至元中立城名曰肇州

其裔孫曰

乃顏又封三弟哈赤溫於黑龍江

今倫

其裔孫曰哈丹竝

據形勝雄士馬至世祖至元二十四年而乃顏叛世祖親

征平之明年哈丹又叛先後四年乃靖初乃顏之將叛也

世祖遣丞相伯顏馳往覘察乃顏將執之伯顏以計得脫

帝乃敕諸王闔里鐵木爾節制東方諸軍不許乃顏調發

又詔遼東宣慰使塔出領萬人與皇子愛耶赤同備禦女

真水達達官民又遣近侍阿沙不花安撫北方納牙大王

等以孤其外應

宗室表太宗第六子合丹大王之子曰那海大王疑即納牙

既而乃顏

叛帝議親征右丞博羅歡曰昔太祖分封東諸侯其地與戶臣皆知之以二十爲率乃顏得其九餘五諸侯得其十一但徵五諸侯兵自足當賊何煩乘輿五諸侯者芒兀王兀魯王札刺爾王弘吉刺王亦乞列思王也帝從之詔李庭董士選出師將校多蒙古人或其親暱立馬相向語輒釋仗不戰帝患之葉李請用漢兵列前步戰而聯大軍斷其後示死鬪乃詔漢軍得以漢法戰時乃顏陰遣使誘西方耶不干王勝納哈王同叛爲金山防禦都指揮使土圖哈所執奏聞詔勝納哈由西道入朝不令由東道以其分地在東也而耶不干遂叛應乃顏土圖哈卽日率數千騎疾馳七晝夜渡土兀刺河卽土拉河戰於孛怯嶺方暑北風大起乘風力戰大敗之耶不干僅以身免土圖哈收其餘黨沿河而下走鐵

兵亦距開平僅百餘里繼而脫里赤亦至燕括民爲兵人心洶洶皇后急遣使馳報軍中請帝速還於是大軍北返十二月駐蹕燕京近郊詰脫里赤等擅括民兵之罪脫里赤託先帝臨終遺命帝察其包藏禍心盡縱遣所集兵明年三月世祖卽位四月阿里不哥亦發兵稱帝於和林初憲宗時攻戰常在川蜀而輜重在六盤山皆精兵所在阿里不哥命劉太平霍魯懷行省於關右謀籍以舉事世祖詔徵諸路兵三萬人衛燕京以精兵萬五千守開平命諸路市馬萬匹戰襖裘帽各萬計米十萬石輸開平府及撫州淨州沙井魚兒渌以備軍儲以總帥汪良臣統陝西漢軍守沿河隘立望雲驛非軍事毋得輒入詔陝西四川宣撫司八春節制諸軍以商挺廉希憲宣撫陝蜀捕劉太平

霍魯懷於京兆尸諸市竝誅其黨乞帶不花於東川明里火者於西川六盤守將哈刺不花者征蜀時驍將也與渾都海善又交通隴蜀諸將至是以六盤兵應阿里不哥反七月帝自將北征阿里不哥聲其違命之罪詔諭中外商挺廉希憲令八春汪良臣發兵西禦六盤挺希憲議曰爲六盤有三策悉銳而東直撼關中彼上策也聚兵六盤觀釁而動彼中策也重裝北歸以應和林彼下策也吾今遣兵西扼隴阪勿與爭鋒但張聲勢使不得東則賊趨而西必出下策已而渾都海聞關中有備果西渡河趨甘州希憲曰賊西而不東無能爲矣又招撫蜀將紐璘奧魯官之觀望者使歸順於是西川兵不與寇合六盤之兵旣北而阿里不哥遣阿藍荅自和林帥師南來與哈刺不花渾都

海遇於甘州哈刺不花以議不合引軍北去阿藍荅遂與  
渾都海合軍而南諸將失利於甘州河右大震川蜀復洶  
洶響應朝議欲棄兩川守興元希憲力言不可詔諸王合  
丹合必赤及汪良臣率師拒之合丹將騎兵與汪良臣八  
春分三道進旣陳俄大風揚沙晝晦良臣令軍士下馬以  
短兵突其左繞出陳後潰其右而出八春直擣其前合丹  
勒精騎邀其歸路大戰西涼城外乘風勢衝之敵大敗斬  
阿藍荅渾都海西土悉平十二月帝至自和林駐蹕燕京  
近郊明年帝復親征阿里不哥於漠北敗諸昔木土海子  
阿里不哥北遁詳見本紀及朮赤台各傳其渾都海軍自  
中統初年衄於西涼後餘眾北走復推哈刺不花爲帥有  
耶律楚材子鑄者前在六盤山說渾都海等入朝不從則

棄其妻子挺身歸國其子希亮爲賊黨遮留脅使西行由沙州北川涉雪踰天山至北庭都護府次年至昌八里城夏踰馬納思河抵葉密里城乃定宗潛邸湯沐邑也時六皇后之妹主后位與宗王火忽皆欲東覲已而不果行冬至於火孛之地三年定宗幼子大名王閔鑄妻子遺以鞍馬幣帛乃從至忽吉爾之地會宗王阿魯忽至誅阿里不哥所用鎮守之人欲附世祖希亮乃復從二王還至葉密里城五月又爲阿里不哥兵所驅西行千五百里至孛烈撒里之地六月又西至換札孫之地又從至不剌城又西行六百里至徹徹里澤刺之山后妃輜重皆留於此希亮單騎行二百里至出布爾城又百里至耶里虔城而哈刺不花之兵奄至希亮從二王興師還至不剌城與哈刺不

花戰破斬之盡殲其眾二王乃函其首遣使報捷四年至

可失哈里城四月阿里不哥兵復至希亮又從征至渾八

升地時希亮母從定宗后避暑於阿體八升山世祖遣使

至二王所以璽書召希亮馳驛赴闕六月由苦先至哈刺

火州出伊州涉大漠還紀傳敘阿里不哥敗後不言何之

葉密里即今伊犁可失哈里即今喀什噶爾蓋阿里不哥

敗後不能爲軍至元元年與諸王玉龍荅什阿速台昔里

吉等此三王皆憲宗子皆來降自歸於上都言爲奸臣所誣誤詔

以諸王皆太祖之裔旣知悔罪竝赦不問惟誅其謀臣不

魯花忽察圖滿阿里察脫忽思等四人此中統初北藩一

叛也其後海都篤哇諸王又相繼而起

初太祖滅乃蠻自斡難河徙都和林其和林以北直抵鐵



勒北極出地五十五度際海之地皆屬畿輔不封建至太宗以嶺北遼闊乃封皇長孫海都皇七子蔑里皇次孫篤哇於嶺北至憲宗又封皇四子河平王昔里吉及皇次孫撒里蠻一作撒一作沙於嶺北海都者太宗長子合失台之子也合失台早卒海都嗣封梟雄好兵據極北廣莫之地土馬強健控弦十餘萬又自以太宗嫡孫不得立而憲宗世祖皆以皇姪承大統內不平至元初世祖定南方徙都燕京其和林地改置行中書省於是海都犯邊欲盜據漠北且徧煽西北諸王篤哇蔑里等同叛廷議征討世祖以宗室至親宜先懷以德乃遣近臣鐵連往宣諭命先詣拔都芒哥鐵木王計事而行拔都者太祖長子朮赤大王之子鎮阿羅思北方宗盟之長也元初諸王無封號是時拔都

弟月祖伯襲封卽以拔都大王爲國號

月祖伯一作月卽伯其後子孫又世

以月卽伯爲號

鐵連欲先覘嶺北形勢乃徑造海都帳海都置酒

大會宗親辨難蠶起鐵連不荅曰今日聚會惟顧飲啖奈何多言欲藉脫空口語爲指摘地邪海都愕然曰直哉使乎鐵連索海都裘海都卽解以贈復詣拔都王所宣上命王曰祖宗有訓叛者人人得而誅之如講解不從我卽助順討逆鐵連歸白於帝曰拔都必不從叛矣海都必反矣兵眾且銳未可與爭鋒宜諭諸將堅壘待之去則勿追斯寇無所逞至元五年海都舉兵入塞世祖逆敗之於北庭追至阿力麻里則又遠遜二千餘里上令勿追十年海都寇益蘭州執斷事官劉好禮拘之數年召至謙州謂曰皇帝疑我至有今日好禮曰若果疑王前至京師肯還之邪

十二年詔皇子北平王統諸軍鎮阿力麻里丞相安童佐之海都兵至帝又使昔班諭海都罷兵來朝海都聽命已退軍置驛而丞相安童先克火和大王部曲盡獲其輜重海都懼遂遁謂昔班曰歸以安童之事聞非我罪也自是海都叛意遂堅巢穴險遠遁輒莫追師還復入寇旣而叛王昔里吉繼之篤哇繼之漠北民避難南走者七十餘萬金山南北不奉正朔垂五十年人皆咎安童貪功激變所致舊史安童傳全諱不載今據昔班傳錄之十四年河平王昔里吉與宗王沙里蠻等劫皇子北平王於阿力麻里械繫右丞相安童脅誘西道諸王叛投海都東道諸王多不從遂帥西道諸王至和林城北詔丞相伯顏督師禦之破諸幹魯歡河而土圖哈亦屢破賊奪回所掠憲宗大帳諸王忽魯台率所部

來歸與伯顏合軍沙里蠻悔過先送還皇子北平王而執

昔里吉出降

此一事本紀諱於前而實於後不自知其矛盾也

沙里蠻者憲宗第

三子玉龍荅什之子也二十一年皇子及安童皆歸自北方凡畱西北七年始歸先是安童將兵臨塞爲昔里吉所執一軍皆沒至二十五年巴鄰來歸從者凡三百九十人是年海都及耶不干王復犯邊詔諸王朮伯駙馬昌吉及東道諸王皆發兵擊卻之執聶坤忽都荅爾兩叛王以歸而耶速不花復以昔烈門叛甘肅行省官約諸王拜達罕駙馬昌吉合兵討之皆自縛請罪獲昔烈門歸京師二十六年皇孫晉王征海都敵先據沅海嶺諸軍不利圍晉王山上土圖哈決圍慶戰翼晉王出險并設伏以待追騎乃退是冬命伯顏出鎮和林二十九年伯顏破海都蔑里一作

里明於阿沙忽圖嶺又夜破其伏兵於必石圖嶺斬二千餘

級獲賊謀不殺遣齋書諭蔑里以禍福蔑里得書感泣後

卒以眾來歸三十年詔土圖哈進取嶺北乞里吉思見地志

師次謙河一作欠河即色棱格河冰行數日始至其境盡收五部之

眾而還屯兵守之海都引兵來爭敗之於謙河時海都所

踞塞外嶺北地深林遂谷數千里太祖時孛羅忽遇伏敗

死之地敵可以來我不可以往故伯顏持重欲俟其深入

一戰覆之廷臣或譖伯顏久居北邊通好海都無尺寸功

詔以御史大夫玉昔代之會海都兵至伯顏遣人止玉昔

曰且緩進俟我翦此寇而後至伯顏七戰七卻諸將怯之

出悖言伯顏曰海都連年入寇邀之則遁兵何時已誘其

深入一戰可禽諸軍必欲速戰儻失海都誰任其咎諸將

請任之卽還軍擊敗海都果遁去是年成宗以皇孫撫軍

北邊鎮金山適海都軍大至大將玉哇什大破之又擊敗

其將巴璘大軍還海都復遣其將圖苦馬以兵三萬直趨

沙一作撒刺思河欲據險襲我師玉哇什以善射三百人守

險竟全軍還大德元年叛王藥木忽爾睿宗第七子阿兀

魯速不花等憲宗第四子昔里吉之子來歸博羅歡奏言諸王之叛皆

由其父此輩幼弱無知宐宥前惡以勸來王旣而叛王篤

哇及蔑里等復與海都相應篤哇一作覲爾赤太詔駙馬

高唐王闊里吉思備禦北方四年武宗以懷寧王統軍北

征秋八月敗海都軍於闊別列之地五年復命晉王出統

大軍適海都篤哇入寇越金山而南屯於鐵堅古山據高

自保大戰於合刺合塔之地大軍分五隊鋒旣交頗不利

懷寧王親出陳力戰大敗之盡獲其輜重援諸王駙馬眾軍以出明日復戰軍少卻海都乘之懷寧王及月赤察爾身先陷陳一軍隨之突出敵陳後反擊又大敗之海都篤哇皆遁去海都旋死九年篤哇及蔑里等聚議曰太祖艱難百戰以有天下我子孫不克安享乃連年構兵自相殘殺今撫軍鎮邊者孰非太祖子孫吾誰與爭哉且連年戰皆無功太祖意可知不若遣使請命罷兵通好以全兵民之命時月赤察爾在軍恐朝命往返稽時乃言於懷寧王先報使而後奏聞由是叛人先後來歸蔑里等皆入朝詔置驛通往來金山南北至是稍靖惟海都及蔑里二部尙負固十年懷寧王復破降蔑里部眾於金山復掩取海都之子察巴爾兩部十餘萬口又詔以篤哇先眾請降旋歿

遣使安撫其子款徹盡徙降部游牧金山之陽而大軍屯田金山之北軍食日饒遂成重戍由是海都蔑里兩叛部欲投款徹者皆不見納黨孤勢絀亦相率內附北地數千里始寧武宗朝詔以和林重鎮諸部降人百餘萬非重臣不足鎮撫命丞相哈刺合孫出鎮北邊於是置驛建倉浚渠募耕計稱海屯田數千頃歲得米二十餘萬北邊大治而蔑里之裔陽翟王至順帝時而又叛陽翟王阿魯輝者太宗七世孫也性姦黠中藏叵測初順帝卽位阿魯輝欺其冲幼進曰天下事宜委宰輔決之庶可責其成效若躬自聽斷萬一差誤空負惡名帝信其言由是深居宮中不治事及兵起汝潁天下震動順帝屢徵北藩兵南討阿魯輝擁眾數十萬遂脅漠北諸宗王以叛且遣使言於帝曰



祖宗以天下付汝汝何故失其大半果不克勝任曷以國  
璽授我我當代爲之帝聞神色自若徐曰天命有在汝欲  
爲則自爲之命知樞密院事徒堅帖木爾擊之行至稱海  
徵哈刺赤兵萬人爲前部其人素不習戰甫陳卽走官軍  
遂敗績二十一年更命知樞密院事老章非襲鎮南王之  
老章蓋宗室同  
名以兵十萬征之大敗其眾禽送闕下伏誅而別封阿魯  
輝弟忽都帖木爾襲陽翟王又封老章和寧王俾以嶺北  
行省丞相鎮北藩據本紀及諸  
武臣列傳

論曰漢唐極盛時藩服至漠北而止元則漠北之地極於  
北海皆樹親藩中外一家輾軼曠古而釁起蕭牆世爲敵  
國與元代相終始宗子維城之固安在哉東藩皆太祖之  
弟北藩皆太宗之子東北叛而西藩獨晏然西藩遠者太

祖駙馬近者亦太祖親子自阿母河行省廢而蔥嶺以西

羈縻於化外其蔥嶺以東則察合台世鎮葉爾羌亦都護

忠著火州雖有宗王阿魯忽

即察合台王之孫

叛於幹端而全局

不爲擾攘蓋天山以南風氣馴弱遠異天山北路之剽悍

自古已然哉而元史亦都護傳乃謂至元十二年都哇卜

思巴等兵十二萬圍亦都護於火州聲言曰阿只吉奧魯

赤諸王以三十萬眾猶不能抗我況汝孤城乎受圍六月

送女講款乃解圍旣而北方軍復至遂死之攷火州畏吾

爾卽今吐魯番爲天山南路極東而都哇等部皆在金山

以北風馬牛不相涉其時皇子北平王統兵阿力麻里皇

孫晉王懷寧王先後統兵和林而又有別失八里之北庭

元帥府據中央以扼南北之衝北方叛兵甫踰金山卽爲

元史卷十九  
大軍擊退安得再越重鎮遠圍火州至半載之久無一軍  
援截而本紀各傳亦無一言火州被圍之事乎都哇等不  
先取和林伊犁別失八里而越國鄙遠以攻火州何爲乎  
抑圍火州者或幹端宗王而非都哇等乎幹端王阿魯忽  
即宗王阿只吉  
也之兄舊史謬盤難以情測姑以質諸曠覽之儒

元史卷二十

列傳六

勳戚

特薛禪

特薛禪弘吉刺氏光獻翼聖皇后之父也本名特因從太祖起兵有功名薛禪故兼稱曰特薛禪與烈祖友善以女許字太祖太祖幼時依其家者數歲長始歸有室焉子曰按陳從太祖征伐凡三十二戰平西夏斷潼關道取回紇尋斯千城皆與有功所統騎軍十餘萬皆循法時國王木華黎好殺戮韃人自言隨國王者皆惡隨尙書令者皆善歲丁亥賜號國舅按陳那顏壬辰賜銀印封河西王以統其國族丁酉賜錢二十萬緡詔弘吉刺氏生女世以爲后生男世尙公主每歲四時孟月聽讀所賜旨世世不絕

又賜所俘獲軍民五千二百仍授萬戶以領之故弘吉剌氏富貴與元代終始元貞元年追封按陳濟寧王諡忠武子幹陳授萬戶尙睿宗女耶速不華公主按陳卒弟納陳襲萬戶從憲宗伐宋攻釣魚山又從世祖南涉淮甸下大清口獲船百餘艘又率兵平山東濟兗單等州中統二年與諸王北伐叛王阿里不哥以其子十人自從戰莽來河逐北至孛羅克圖復戰白旦及夕斬首萬級僵尸被野卒子幹羅陳襲萬戶尙完澤公主主薨繼尙囊加眞公主卒無子弟帖木爾至元十八年襲萬戶二十四年從帝親征叛王乃顏以功封濟寧郡王賜白織蓋以寵之二十五年從諸王討叛王哈丹圖魯干由龜刺河轉戰至老木連河殲其眾賜名按察圖那顏以旌其功卒子二人長曰瑯阿

不刺次日桑哥不刺皆幼至元二十七年以其弟蠻子台襲萬戶亦尙囊加眞公主成宗卽位封皇姑魯國大長公主蠻子台封濟寧王賜金印率本部兵討叛王海都篤哇遇敵軍約戰未定單騎突陳出入數四我軍乘之遂大捷時武宗在藩邸統大軍以鎮朔方令總領蒙古軍民官守莽來河以遏北方公主薨繼尙裕宗女南哥不刺公主卒年五十有二大德十一年三月按察圖長子琯阿不刺襲萬戶尙祥哥刺吉公主六月封太長公主加封琯阿不刺魯王賜金印皇慶閒加封皇姊太長公主天厯閒加號皇姑徽文懿福眞壽太長公主至大三年琯阿不刺卒子阿里嘉室利甫八歲襲萬戶四年襲封魯王尙多爾只班公主至順閒封肅雍賢寧公主桑哥不刺者阿里嘉室利之

叔也幼時世祖命幹可珍公主養之嗣布只爾駙馬後襲統其本部民四百戶成宗時尙普納公主至順閒封鄆安太長公主授桑哥不刺金印封鄆安王元統元年授萬戶二年加封魯王卒年六十一此皆以駙馬襲王封者也梭爾和都者亦按陳之子以從征功在太祖朝遙授左丞相爲千戶子阿哈駙馬當憲宗朝嘗率兵破徐州有功襲父官至世祖時詔弘吉刺萬戶所受塗金銀章驛券圓符世仍其舊凡梭爾和都所受者皆收之而梭爾和都諸孫及阿哈千戶之孫與按陳之弟名冊者在太祖世皆授本藩蒙古軍站千戶冊之子曰哈爾哈孫以平金功賜拔都號哈爾哈孫之孫曰都羅至元四年授光祿大夫以銀章封懿國公有脫憐者亦按陳裔孫也世祖授本藩千戶仍賜

驛券圓符各四令以兵守怯魯連河二十四年從族父按察圖征叛王乃顏有功亦賜拔都號脫憐卒子迸不刺嗣迸不刺卒子買住罕嗣買住罕尙拜荅沙公主卒弟孛羅帖木爾嗣以金章封毓德王孛羅卒買住罕孫阿失襲千戶有名丑漢者按陳次子必哥之裔孫尙台忽魯都公主仁宗朝封安遠王以兵守莽來河有荅爾罕者亦特薛禪裔孫也以從軍功世祖亦賜拔都號其子曰布只爾征乃顏禽其黨金家奴帝賞以金帶其後有曰伯耆者卽其孫也又按陳之孫納合尙太宗校爾哈罕公主火忽之孫布只爾尙幹可貞公主又特薛禪諸孫有名脫羅禾者尙不魯罕公主繼尙闊闊倫公主此皆尙公主爲駙馬者也凡其女之爲后者自光獻翼聖皇后以降憲宗貞節皇后及



后妹皆按陳從孫芒哥陳之女世祖昭睿順聖皇后忠武王按陳之女其曰帖古倫后者按陳孫脫憐之女南必后冊繼守正宮者納陳孫僊童之女成宗貞慈靜懿皇后幹羅陳之女也順宗昭憲元聖皇后生武宗仁宗者則按陳孫渾都帖木爾之女武宗宣慈惠聖皇后迸不刺之女又速哥失里后按陳從孫哈爾只之女泰定皇后按陳孫幹留察之女必罕后速哥荅里后皆脫憐孫買住罕之女文宗皇后瑯阿不刺之女此則引吉刺氏之爲后者也太祖甲戌歲分賜引吉刺氏等農土農土猶言經界也若曰是苦烈溫都爾斤以與按陳及皇弟合薩爾爲界申諭按陳曰可木溫都荅爾海子迭蔑可爾等地汝則居之諭冊曰阿刺忽馬乞進東蒜吉納圖山木爾速拓哈海直至阿只哈溫都

哈老哥魯等地汝則居之當以胡盧忽河北爲鄰按赤台爲界又諭火忽曰哈老溫迤東塗河潢河之間火爾赤納慶州之地與亦乞烈思爲鄰汝則居之又諭按陳之子梭爾和都曰以汝父子克忠於國可木溫都迤東絡馬河至於赤山塗河迤南與國民爲鄰汝則居之至至元七年幹羅陳萬戶及其妃囊加眞公主請於朝曰臣所受駐夏地在上都東北三百里苔爾海子願建城邑以居詔可賜名應昌府後升爲路元貞元年濟寧王蠻子台尙囊加眞公主復請於帝以應昌路東七百里駐冬地建城從之賜名全州升爲全寧府後改爲路弘吉刺之分邑得任其陪臣爲達魯花赤者有濟寧路及濟克單三州鉅野鄆城金鄉虞城碭山豐縣肥城任城魚臺沛縣單父嘉祥嶧陽寧陽

曲阜泗水十六縣又汀州路長汀寧化清流武平上杭連城六縣至大元年武宗益賜永平路灤州盧龍遷安撫寧昌黎石城樂亭六縣明年又賜平江稻田千五百頃其應昌全寧等路則自達魯花赤總管以下諸官屬皆得專任其陪臣而王人不與焉此外復立王傅府自王傅六人而下其羣屬有錢糧人匠鷹房軍民軍站營田稻田煙粉千戶總管提舉等官以署計者四十餘以員計者七百餘其五戶絲金鈔之數則丙申歲所賜濟寧路之三萬戶至元十八年所賜汀州路之四萬戶絲以斤計者歲二千二百有奇鈔以錠計者歲一千六百有奇此則歲賜之制而子孫能忠孝世其富貴無霍梁驕溢撲滿之患尤近古所未有焉

## 孛圖

孛圖亦乞列思氏善騎射太祖嘗潛遣朮徹台出使至耶爾古納河往返皆止宿孛圖帳孛圖刳羊享之復假以良馬朮徹台歸稱其誠款帝召之來見悅之許以皇妹帖木倫公主妻之孛圖言有馬三十匹請以半爲聘帝曰古語有云同心實難朕方欲平定部落爾其爲朕心膂股肱奚以聘財爲時帝初爲合罕已而札木合與帝有隙合諸部兵三萬來襲孛圖聞之遣使來告復率宗人擊掠其輜重降其民後孛圖爲火魯刺部所逼走會帝亦爲克烈部酋王罕所敗相遇同飲班朮河水王罕平復以兵同攻乃滿大戰敗之長公主薨復妻以皇女果眞公主時火魯刺部已降乃命其酋之子帶弓矢爲之媵其酋哈爾八台怒不

許相拒於宛圖河拙赤河孛圖連戰禽其父子殺之盡有其眾從太師國王木華黎略地遼東西以功封冠懿二州從征西夏還太祖崩不逾旬孛圖亦卒太宗命還葬本土乞只爾地仍禁其地三年如國制至治元年贈推忠宣力佐命功臣太師駙馬都尉圖王諡忠武子二長帖堅干事太宗爲萬戶南征攻嘉州有功師還卒於道諡忠定次瑣爾哈襲爵尙太宗皇子幹赤女安圖公主生女爲憲宗后子札忽爾臣從定宗出討萬奴有功太宗命尙濟南王女卒諡忠靖子二長月列台尙皇子賽因主卜女生脫別台與乃顏戰有功次忽憐尙憲宗女伯牙魯罕公主後脫黑帖木爾叛世祖命忽憐與失列及等討之大戰終日脫黑敗走帝嘉之復令尙憲宗孫女不蘭奚公主宋平封以廣

州世祖親征乃顏薛徹堅等與其將哈刺罕方大戰於程  
火失溫之地忽憐至卽以兵二百衝陣敗之哈刺罕等走  
度祿河逾年夏復命往征大戰曲列河塔兀河之間敵渡  
河遁去餘百人逃匿山谷忽憐卽率兵二百徒步追之薛  
徹堅力止不聽竟殪其眾後歲餘復進擊哈刺罕於兀刺  
河率千人夜襲殲之賜拔都號至治元年追封昌王諡忠  
宣子阿失事成宗大德五年從晉王懷寧王討叛王篤哇  
於哈刺蒼山阿失射篤哇中膝號哭遁成宗加賜珠衣至  
大元年封昌王置王府官屬仁宗朝復賜食寧昌縣稅入  
阿失初尙成宗女亦里哈雅公主生女爲英宗后復尙憲  
宗曾孫女邁的郡主子七長巴刺失里襲爵尙禮合牙公  
主泰定初鎮阿難荅所居地子沙藍朵爾尙月魯公主忽

憐從弟不花尙世祖女兀魯真公主其弟鎖郎哈尙皇子  
芒哥刺女魯兀倫公主生女是爲武宗仁獻章聖皇后寶  
生明宗英宗至治元年詔翰林官張士觀撰駙馬昌王世  
德之碑泰定帝順帝封邁的月魯二公主曰皇妹皇姊邁  
的賜銀印

孛要合

孛要合汪古部人阿刺兀氏系出沙陀雁門之後遠祖卜  
國世爲部長金源氏塹山爲界以限南北其父阿刺兀思  
剔吉忽里以一軍守其衝要時西北乃滿國太陽可汗遣  
使來欲使爲己右臂同拒蒙古據朔方部眾多欲從之阿  
刺兀思知乃滿非太祖敵弗從乃執其使奉西域葡萄酒  
六榼來告其謀時朔方但飲湏酪無酒太祖祭而後飲三

餽而止曰是物少則發性多則亂性酬以馬羊各二千遂約同攻太陽可汗會於其地先期至既平乃滿從下中原復爲鄉道南出界垣歸鎮本部爲部下昔之異議者所害長子不顏昔班併死之其妻攜幼子孛要合與姪鎮國逃難夜遁至界垣門已閉告守者縋城以登因避地雲中太祖既定雲中購求得之賜子甚厚乃追封阿剌兀思高唐王諡忠武以其子孛要合尙幼先封其姪鎮國爲北平王太祖攜孛要合征西域及還年十七鎮國已卒繼封北平王尙太祖女齊國太長公主仍約世爲婚姻號安達忽荅而鎮國之子聶古爾亦襲爵尙睿宗女卒江淮軍中齊國太長公主明睿有智略車駕征伐四出嘗使畱守駐漠南雲中之地軍國大政諮稟而後行師出無內顧之憂所謂



監國公主者也有婦士數千事之征伐斬殺皆出其手國王木華黎專征中原辛巳年公主遣使勞之於青冢大享宴賚字要台初未有子公主爲進姬妾以廣嗣續生三子曰君不花曰愛不花曰拙里不花公主皆視如己出字要台卒追封高唐王諡武毅進封趙王公主寡居後復攝白韃部國事日誦佛經漠然不知富貴長子君不花尙定宗長女葉里彌什公主從憲宗攻釣魚山敵有據險張蓋而詬者弧矢莫及君不花一矢顛之遂拔其壘愛不花尙世祖季女月烈公主中統初總兵征叛王阿里不哥三年圍李璫於濟南又從征西北叛王沙里蠻皆力戰有功卒諡高唐武襄王子闊里吉思

闊里吉思有文武材力篤經術築萬卷樓於私第日與諸

儒討論經史性理陰陽術數靡不該貫尙皇太子真金女

忽答迭迷失公主繼尙成宗女愛身失里公主至元閒宗

王耶不干叛闊里吉思率精騎千餘晝夜兼行旬日追及

之時方暑將戰北風大起左右請待之闊里吉思曰當暑

而風天贊我也策馬赴戰騎士隨之盡殲其眾耶不干僅

以數騎遁

此與土圖哈傳追敗叛王耶不干蓋同  
一事其時闊里吉思殆別將一軍追之

闊里吉

思身中三矢斷其髮凱還二十九年奉詔與脫忽思等議

行屯用於合敦奴孫界成宗卽位封高唐王時海都篤哇

煽亂再三請往討帝乃許及行且誓曰若不平定西北吾

馬首不南大德元年夏遇敵於伯牙思之地眾謂當俟大

軍畢至與戰闊里吉思曰大丈夫報國而待人邪卽整眾

鼓譟以進大敗之禽其將卒百數以獻詔賜世祖所服貂

裘寶鞍及介冑戈戟弓矢等物二年秋諸王將帥共議防邊咸曰敵往歲不冬出且可休兵境上闕里吉思曰不然今秋候騎來者甚少所謂驚鳥將擊必匿其形備不可緩也獨嚴兵以待是冬敵果大至三戰三克乘勝逐北深入險地後騎不繼馬蹢被執敵誘之使降不屈又欲以女妻之闕里吉思毅然曰我帝婿也汝何人而敢婿我敵不敢逼帝遣其家臣至敵境闕里吉思一見輒問兩宮安否次問嗣子何如言未畢左右卽引去竟不屈死焉旅殯卜羅之地九年加贈太師駙馬都尉諡忠憲追封趙王兩公主竝封齊國加封趙國子朮安幼詔以弟朮忽難襲封高唐王尙阿失圖魯公主至大二年加封趙王卽以王爵讓朮安復封朮王三年朮安襲趙王尙晉王女阿剌忒納八刺

公主請於朝迎其父殯歸葬詔翰林承旨閻復碑其神道  
元代尙公主者莫盛於魯昌趙鄆而鄆國公主所降駙馬  
寧濮郡王昌吉岐王脫帖木爾部族無可攷勲業亦不顯  
惟魯昌趙三王能世其家字要合子孫進封趙王者數世  
所尙諸公主率封趙國太長公主云

元史卷二十一

列傳

九

元史卷二十一終

元史卷二十一

列傳七

開國四傑

木華黎

子孛羅 孫塔思 速渾察 義都魯 曾孫乃燕 相威 玄孫託託 乃蠻台

木華黎札刺爾氏世居阿難水東父孔溫兀荅以戚里從太祖平蔑里吉及乃滿別部數立功後乃滿別部忽叛我師突爲所乘潰散太祖與六騎走中道乏食禽水際橐駝燔之以獻追騎垂及而太祖馬斃五騎相顧駭愕乃解所乘馬濟太祖而身當追騎以死木華黎其第三子也生時有白光出帳中及長沈毅多智猿臂善射挽弓二石強一日太祖從三十餘騎行谿谷間忽寇自林突出矢雨集木華黎引弓三發殪其三先鋒命左右皆引滿待而自解馬韉障太祖以出歷平克烈部乃滿部語詳削平諸國傳歲

丙寅太祖卽位於斡難河首命木華黎博爾朮爲左右萬戶六年辛未從伐金薄宣德克德興府七年壬申攻拔雲中九原諸郡進圍撫州金兵數十萬陳野狐嶺北木華黎曰彼眾我寡弗致死力戰未易破也率帳下敢死士數百人怒馬大呼陷陳諸軍齊奮金兵大北追至滄河僵尸百里癸酉攻居庸關壁堅不得入遣別將哲伯統兵趨紫荆口金左監軍高琪引兵來拒不戰而潰遂拔涿州因分兵攻下益都濱棣諸城遂次霸州史天倪勸勃迭率眾來降竝奏爲千戶九年甲戌從圍燕金主請和北還命統諸軍征遼西舊作遼東今據蘇天爵名臣事略作遼西次高州盧琮金朴以城降十年乙亥用降將蕭耶先計襲取東京旣而東京復爲金宣撫司完顏萬奴所據蕭耶先卽石抹耶先也此與石抹傳同與本紀七年壬申哲伯襲取東京

不木華黎進攻北京北京大寧也木華黎奉詔往征遼西

同西未攻先攻東京之理石抹耶先傳及本紀所書哲伯取東京事疑皆北京之誤金守將銀青率

眾二十萬拒花道逆戰敗之斬首八萬餘級城中食盡契

丹軍斬關來降進軍逼之其下殺守將銀青推寅荅虎為

帥石抹耶先傳云破東京降守臣寅荅虎等與此不合豈

京降平舊史此事遂舉城降木華黎初怒其降緩欲阬之

以蕭耶先諫而止奏寅荅虎畱守北京以烏耶爾權兵馬

都元帥鎮之北京南破即以寅荅虎守之又以烏耶爾為

領之何以東京破後不置一官且以取東京有功之哲伯

石抹耶先及以東京降之寅荅虎亦不畱一人鎮守有是

乎遣使招諭興中府吏民殺金吏推土豪石天應為帥舉

城降奏為興中府尹錦州張鯨聚眾十餘萬殺節度使稱

臨海郡王至是來降詔以鯨總北京士馬從南征未附州



郡木華黎密察鯨有反側意請以蕭耶先監其軍至平州鯨稱疾逗遛復謀遁去監軍蕭耶先執送行在誅之鯨弟致復據錦州木華黎遣芒古不華以軍數萬討之進逼紅羅山主將杜秀降奏爲錦州節度使十一年丙子致陷興中府七月進兵臨興中木華黎以致兵精憑堅城欲設奇取之乃遣烏耶爾別攻溜石山諭之曰爾但急攻山砦賊必遣兵來援我斷其歸路一戰可禽也又遣芒古不華屯承德縣東候之致果遣騎兵八千步卒三萬來援芒古不華引兵趨之馳報木華黎夜半引兵疾馳比曙遇賊神水縣東夾擊之分麾下兵之半下馬步戰曰賊步兵無甲疾射之陣必亂因麾騎兵繼進大敗之拔開義圍錦州月餘其監軍高益縛致出降伏誅廣寧劉珍懿州田和尚亦降

木華黎曰此叛寇存之無以懲後除工匠優伶外悉屠之拔蘇復海三州咸平宣撫完顏萬奴等率眾十餘萬遁入海島十二年丁丑帝將征西夏及回部欲以中原專任木華黎八月詔封國王太師授天下兵馬大元帥都行省承制行事賜誓券黃金印分引吉刺亦乞列思兀魯芒忽等十軍及諸漢諸軍竝屬麾下諭曰太行之北朕自經略太行以南一以付卿賜大駕所建九旂太白旗以號令諭諸將曰如朕親臨也蒙韃備錄曰成吉思儀衛建大純白旗一白旗九尾中有黑月出師則張之其下必元帥方有一旗一鼓他將皆無也又令第三女監國公主駐帳雲中司中原軍馬事務木華黎乃旋征遼之師而西建行省於雲中及燕京以圖中原遂自燕南攻拔遂城蠡州冬破大名府乘勝定盩都漕登萊濰密等州十三

年戊寅自西京由太和嶺入河東攻太原忻代澤潞汾霍等州悉降遂徇平陽金守臣棄城遁以前鋒哲伯按察爾統蒙古軍鎮之十四年己卯遣將一出雲朔攻降岢嵐火山軍一攻吉陽州進克絳州十五年庚辰復由燕徇趙至滿城武仙舉真定來降用史天倪言始下令禁剽掠所獲老稚悉遣還田里兵至潞陽金邢州節度使武貴迎降遣芒古不華分兵略定河北衛懷孟三州師至濟南嚴實籍所隸相魏磁沼恩博滑濬等州詣軍門降黃河自金章宗明昌五年分流南徙故山東失險盡爲元有將由黃陵岡渡河而西金亦盛兵屯黃陵岡號二十萬遣步兵二萬襲濟南木華黎以輕騎五百擊走之遂會大軍薄黃陵岡金兵陣河南岸示死戰木華黎令騎下馬引滿齊發已亦下

馬督戰大敗之溺死者眾然金兵猶據河守拒乃仍沿河收山東未下諸州郡楚丘城小而固四面皆水令諸軍以草木填塹直抵城下嚴實率所部先登拔之攻下單州進圍東平不下木華黎率兵趨洺州略河北畱嚴實權山東西路行省戒曰東平糧盡必棄城走汝卽入城安輯之毋徒攻城多傷士卒十六年辛巳四月東平糧盡果潰奔汴我兵邀斬七千餘級嚴實遂入城建行省於府治遣石天應攻拔洺州還軍野狐嶺宋漣水忠義統轄石珪京東安撫使張琳皆來降鄭遵亦以棗鄉脣縣降皆令權本境總管元帥府事初大軍之南侵也因唐古紂二十五部叛軍及金降臣鄉導攻燕盡知中原虛實凡攻大城先擊小邑掠其丁壯供驅使下令一騎必掠十人人數備則每人責

草薪土石迫期必集遲者死以填濠立平或供鵝車礮坐  
之用故所向無不破木華黎已定山東河北將進取關西  
秋八月還駐青冢監國公主自雲中遣使來勞大饗將士  
遂由東勝渡河西夏國主李旺懼請以兵五萬屬焉冬十  
月復由雲中歷大和寨入葭州金將王公佐遁以石天應  
權行臺守之而自將兵取綏德破馬蹏寨距延安三十里  
止舍金元帥完顏合達出兵三萬陳於城東芒古不華以  
騎三千覘之馳報曰彼見吾兵少有輕我心明日合戰當  
佯敗而伏兵以勝之夜半大軍銜枚齊進伏城東兩谷閒  
明日芒古不華甫戰佯棄鼓旗走金果縱兵追入伏中萬  
矢齊發金兵大敗合達走保延安圍之旬日不下乃南徇  
洛川克鄜州遂降坊州大饗士卒聞金復取陽州乃復由

丹州渡河克隰州畱蒙古軍鎮石隰閒十七年壬午秋七月令芒古不華引兵出秦隴上游相度形勢而大兵道雲中攻下孟州拔晉陽進克霍邑薄平陽青龍堡金守將開壁降八月有星晝見隱士喬靜真以爲不利進兵木華黎曰我奉命收復中原今河北山東雖平而關西河南未下若因天象而不進兵何以復君命冬十月過晉至絳拔榮州所至望風歸附復有河中之地木華黎以蒲州爲河東要害乃以石天應權河東關西行臺鎮守之命先造浮梁於黃河以俟歸師乃渡河拔同州下蒲城徑趨長安金元帥完顏合達引兵二十萬固守不下乃分麾下兵六千屯守之遣兵三千斷潼關自將西攻鳳翔月餘不下謂諸將曰吾奉命專征不數年取遼西遼東山東河北皆不勞餘

力何今年以來攻關中諸城皆不下豈吾命將盡邪乃駐兵渭水南遣芒古不華南越牛嶺關徇宋鳳州而還會石天應爲中條山賊所襲殺城陷十八年癸未班師至河浮梁未成顧諸將曰橋未畢工安可坐待復攻下河西十餘堡三月渡河還至聞喜縣疾篤召其弟帶孫曰我爲國家擐甲垂四十年東征西討助成大業惟汴京未下是吾遺憾汝其勉之卒年五十四木華黎威權侔人主衣服儀從皆用天子禮而親將士如兄弟不許稱國王止以小名呼之不矜不伐故人皆樂爲死厥後太祖親攻鳳翔謂諸將曰使木華黎在朕不親至此矣至治元年追封魯國王諡忠武

傳文全本元明善東平世家

子孛羅嗣

一作枹柯一作李魯

孛羅少從父軍中美容儀不肯薙髮惟巾帽窄服軍中望

如神人聰穎寬厚通諸國語善騎射木華黎每征伐歸雲中則諸夫人連日各爲主迭置酒飲燕享羅輒起舞爲壽年二十七入朝行在所時太祖在西域夏國主李旺陰結外援蓄異圖密詔孛羅東歸討之十九年甲申秋攻克銀州斬首數萬級獲生口馬駝牛羊數十萬俘其大將塔海畱軍守其要害而還二十年乙酉春復朝行在所武仙叛眞定殺都元帥史天倪仙弟質軍中逃歸遣兵追斬於紫荆關二十一年丙戌夏詔封功臣戶口爲食邑曰十投下孛羅居其首宋將李全陷益都孛羅引兵圍之先遣李喜孫往諭全被殺二十二年丁亥春三月全突圍欲走邀擊敗之城中食盡請降諸將以全勢窮出降非心服若不誅必爲後患孛羅曰誅一人易耳山東諸城未下者尙多全



素得人心般之不足立威徒阻來者乃奏全爲山東淮南  
楚州行省郡縣聞風款附時滕州尙爲金守諸將畏炎暑  
欲緩進攻字羅曰主上親征西域數年未聞當暑不戰我  
等其敢自逸遂進兵金兵屢北開門出降俾元帥蕭乃台  
統蒙古軍屯濟兗闊闊不華以兵三千屯濰沂莒以備宋  
千戶按禮統大軍駐河北以備金九月師還至燕聞太祖  
崩趨赴北庭哀毀遭疾明年卒年三十二追封如其父諡  
忠定

塔思一名查刺溫木華黎孫字羅子也英才大略有祖風  
木華黎常器之年十八襲爵遂鎮雲中庚寅秋九月叛將  
武仙圍潞州太宗命塔思救之仙退軍十餘里大兵未至  
塔思率十餘騎覘賊形勢仙恐有伏不敢犯塔思曰日暮

矣待明旦擊之是夜五鼓金將耶律蒲阿來襲營我師不利退守沁南敵還攻潞州城陷冬十月帝親征塔思復取潞州仙夜遁邀擊之斬首七千餘級十一月帝攻鳳翔命塔思守潼關以備金兵河中自石天應死復爲金有辛卯帝親攻拔之金元帥完顏訛可遁塔思追斬之王辰春皇太弟拖雷與金兵相持汝漢閒帝命塔思與親王按赤台叩溫不華先渡河爲聲援至三峰山與皇太弟兵合金兵成列將戰會大雪塔思冒矢石先挫其鋒諸軍繼進大敗之遂拔鈞州三月帝北還詔塔思與忽都虎統兵略定河南諸郡癸巳秋九月從定宗於潛邸東征禽金咸平宣撫完顏萬奴於遼東萬奴故金宗室

金史稱蒲鮮萬奴他書每云遼裔惟此云完顏

氏則其爲金宗室明矣

受王子三太王之說所由來歟

耶律蒲阿方以遼裔叛金斷無再遣遼裔討之之理

白

乙亥歲率眾保東海至是平之甲午秋七月塔思朝太宗於行在所賀平金也時諸王大會帝以中原西夏高麗回鶻諸國皆已臣附惟南宋尙負隅敗盟欲躬行天討塔思對曰此臣子之事也願仗天威掃清淮浙以報國恩何敢以敵寇勞君父帝悅賜黃金甲命與皇子曲出總軍南征乙未冬拔棗陽曲出別循襄鄧塔思引兵攻郢復出鄧州遂至蘄黃進拔符鎮六安縣焦家寨由八柳渡河過汴京守臣劉甫置酒大慶殿塔思曰此前朝金主所居我人臣也豈可處此遂宴甫家戊戌三月朝太宗行在所帝宴羣臣於行宮塔思大醉帝語侍臣曰塔思神已逝矣其能久乎命還雲中卒年二十八子碩篤方幼太宗命其弟速渾察襲爵

速渾察字羅仲子塔思弟也少嚴重有威與兄塔思從太宗攻鳳翔有功將兵抵潼關與金人戰屢捷旣滅金皇子闊出攻宋棗陽入郢速渾察皆與焉歲己亥塔思卒子幼速渾察以仲弟襲爵置營上京之西總中都行省蒙古漢軍凡他行省監鎮事必先白其可否而後上聞賞罰明信人莫敢犯帝嘗遣使至見其部曲整肅還朝以聞帝曰眞木華黎家兒也他國使有至者每見之皆倉皇失措左右或諫曰諸王百司旣皆守法何必過威使人恐懼益少寬以慰之速渾察曰爲政寬猛各視其時天下初附人心未安倘守土吏弛縱反側復生悔之何及吾嚴馭之所以全之也卒封東平郡王諡忠宣子四人曰忽林池襲王爵曰乃燕曰相威曰撒蠻

霸圖魯亦木華黎孫字羅第三子也從世祖征伐爲先鋒  
元帥累立戰功世祖在潛邸從容語之曰今天下稍定吾  
欲勸主上駐蹕回鶻以休兵息民何如對曰帝王所居必  
近中原以受四方朝貢幽燕形勢西北負山東據海獨關  
南面以臨天下果欲宅中控制非燕京不可世祖慨然曰  
非卿言吾幾失之己未秋命霸圖魯率諸軍由蔡伐宋與  
世祖兵合而南五戰皆捷遂渡大江傅於鄂會憲宗崩  
阿里不哥構亂和林世祖北還畱霸圖魯總軍務以待命  
世祖至開平卽位還定都於燕嘗曰朕居此以臨天下霸  
圖魯之力也中統二年卒於軍追封東平郡王諡武靖子  
四人長安童別有傳

乃燕木華黎曾孫速渾察仲子也速渾察旣卒憲宗擇於

諸子以乃燕好學有賢名命襲爵乃燕辭曰臣有兄忽林池當襲帝曰汝兄柔弱恐不能勝且汝父亦以仲弟襲父爵汝何不可也忽林池亦固讓乃燕頓首涕泣固辭不得命則曰王爵必不敢受如必任臣者請代兄行軍國之事於是忽林池襲國王而乃燕佐之事無巨細必共謀議剖決精當世祖在潛藩常與論事乃燕援據典故析以大義世祖謂可大用因號之薛禪猶華言賢智人也乃燕雖親信居顯要而小心謹畏每誨羣從子弟曰先王百戰以啟藩封子孫何功德而坐享之常恐不堪福祿墮先王之業矧敢驕佚乎卒贈魯郡公子二人曰碩德曰伯顏察碩德通敏有幹才世祖卽位入宿衛典朝儀後同知通政院事帝憂遼東幹拙吉烈蔑二種人數爲寇欲遣近人招諭之

而難其人僉舉碩德可使乃賜御衣錫宴以行碩德至集諸萬戶陳兵衝要誅其渠魁脅從皆降其地險阻厓石錯落盛夏水漲乃可行舟冬則以犬駕杷行冰上地無禾黍以魚爲糧乃相山川形勢除道以通往來遠近便之後從征乃顏及使西域屢建殊勳卒贈魯郡公諡忠敏

相威木華黎之曾孫速渾察第三子也性宏毅重厚不飲酒寡言笑喜延士大夫聽讀經史論古今治亂至元十一年世祖命相威總速渾察元統弘吉剌等五投下兵從伐宋由正陽取安豐略廬克和道安慶渡江東下會丞相伯顏兵於潤州分三道並進相威率左軍參政董文炳爲副部署將校申明約束江陰華亭澈浦上海鹽官悉望風款附伯顏已下臨安相威乃移兵瓜洲與阿朮兵合臨揚州

敗宋都統姜才之兵於楊子橋十三年親王海都叛命領  
汪總帥兵以鎮西土十四年召拜江南諸道行臺御史大  
夫奏言陛下以臣爲耳目臣以監察御史按察司爲耳目  
倘非其人是耳目先自閉塞下情何由上達帝命御史臺  
清其選每除日至必集幕僚御史議其可否不協公論者  
卽劾去之繼陳便民十有五事略曰并行省削冗官鈐鎮  
戍拘官船業流民錄故官減餽遺并鹽運司司農營田司  
入宣慰司理訟勿分南北公田召佃仍減其租革宋公吏  
勿容作敝帝皆納焉浙東盜起浙西宣慰使昔里伯縱兵  
俘掠平民乃遣御史商琥據錢塘津渡閱治之得釋者數  
千昔里伯遁還部奏執還揚州治其罪十六年入覲會左  
丞崔斌等言平章阿合馬不法事命相威及知樞密院博



羅白開平馳驛大都共鞠之阿合馬稱疾不出相威厲聲色令輿疾赴對首責數事既引伏有旨釋免仍諭相威曰朕知卿不徇顏面復命還南行臺十七年有旨命相威檢覈阿里海牙及忽失等所俘宋民三萬二千餘口竝放爲民十八年帝將再征日本一時無敢諫者相威遣使入奏曰倭不奉職貢可伐而不可恕可緩而不可急向者師行迫期戰船不堅前車已覆後當改轍今爲之計預修戰艦訓練士卒耀兵揚武使彼聞之深自備禦遲以歲月俟其疲怠出其不意乘風疾往一舉而下萬全之策也帝意始釋遂罷其役又陳皇太子旣令中書宣領撫軍監國之任選端士爲詹事賓客諭德贊善衛翼左右以樹國本帝深然之十九年又奏阿里海牙占降民千有八百戶爲奴語

詳阿里海牙傳二十年以疾請入覲進譯資治通鑑帝卽以賜東宮經筵講讀拜江淮行省左丞相二十一年卒於蠡州年四十四訃聞帝悼惜不已子阿老瓦丁南行臺御

史大夫孫脫歡集賢大學士

舊史相威及乃蠻台皆別傳今移并

託託

舊作脫脫

木華黎玄孫而速渾察之孫撒蠻之子也撒蠻

自襁褓時世祖撫之若子嘗挾以南征同舟濟大江慮其有失繫之御榻及長常侍左右帝嘗詔掌掖庭男女異路之制旣而近臣孛羅銜命出行失其次撒蠻拘之別室帝詢知其故命釋之撒蠻曰台自陛下出陛下自違之何邪帝由是有意大任之會以疾卒不果年僅十有七託託幼旣失怙稍長直宿衛世祖親誨導之儀觀甚偉喜與儒士語至元二十四年從征東方叛王乃顏帝駐山顛旌旗蔽

野鼓未作託託遙望敵有隙可乘卽擐甲率親兵數十疾馳擊之敵眾皆披靡帝望見曰此寇易禽也亟召託託還親解佩刀及所乘馬賜之曰撒蠻可謂有子矣由是預聞機密其後復從皇孫鐵穆耳征叛王哈丹躍馬督陳馬陷於淖哈丹兵卻而復進託託弟阿老瓦丁奮戈衝擊眾乘之遂大敗敵軍侍衛禁闥出入惟謹自以受先帝命戒酒而未能剛制及宮車晏駕後卽痛屏杯罍誓不近前時成宗新卽位聞之喜曰世臣能念先帝如此真可大用出爲江浙行省平章命中書祖道都門外始至嚴飭左右咨訪掾屬時朱清張瑄以海運故致位參政多行不法恐發覺獲罪預以黃金五十兩珠三囊交驩於託託託大怒繫其使以聞自是豪猾屏息民賴以安大德十一年卒於位

年四十四子多爾只別有傳

乃蠻台木華黎五世孫曾祖曰孛羅祖曰阿禮吉什追封  
莒王諡忠惠父曰忽速忽爾嗣國王追封薊王乃蠻台身  
長七尺射能貫札大德閒奉命征叛王海都篤哇有功七  
年拜嶺北行省右丞舊制募民中糧以餉邊是歲中者三  
十萬石吏挾私爲市殺其數止十萬民進退失措乃蠻台  
令所輸者悉受儲以爲下年之數民感其德英宗至治初  
進甘肅行省平章甘肅歲糴蘭州糧二萬石距寧夏千餘  
里至甘州又千餘里始達亦集乃路而寧夏距亦集乃路  
僅千里因令輓者自寧夏徑趨亦集乃路歲省費六十萬  
緡尋移陝西關中大饑詔募民入粟予爵四方應輸者露  
積關下關吏拒粟使不得達乃蠻台杖吏而入其粟又慮

貧民無鈔糴粟命取官庫未燬昏鈔得五百萬緡識以省印暫給民用俟官給振鈔至如數易之文宗時進封宣寧郡王賜金印尋奉命出鎮北邊錫予尤重國初諸軍置萬戶千戶百戶時金銀符未備惟加纓於槍首以別等威至是乃蠻台爲請於朝始得分給金銀符後至元三年詔乃蠻台襲國王授以金印繼又以安邊睦鄰功賜珠絡半臂竝海東名鷹西域文豹國制以此爲極恩六年拜嶺北行省左丞相至正二年遷遼陽行省年踰六十上疏辭職歸八年卒於家木華黎子孫世襲國王與元終始若安童若拜住若多爾只皆一時賢相而乃蠻台及多爾直班亦皆以忠孝世其家百餘年無一墮業者蓋史冊以來所未有焉

博爾朮

孫玉昔

玄孫阿魯圖

紐的該

博爾朮

一作亭  
闕爾出

阿爾刺氏自祖以上世以才武雄朔方父

納忽阿闐與烈祖鄰部和睦太祖微時有八驢馬爲要爾

斤部卒盜去太祖單騎追之中途遇博爾朮意氣相得自

請往助眾寡不敵乃出奇從旁夾擊之盜舍所掠去遂驅

馬而還時博爾朮年方十三也太祖少爲泰赤烏所捕與

母弟等以八騎避入布爾罕山博爾朮亦預焉及太祖爲

合罕與泰赤烏戰兩軍相接下令死戰勿許退博爾朮繫

馬於腰蹠而引滿跬步不離故處太祖嘉其勇膽又嘗潰

圍於克烈部太祖失馬博爾朮擁帝累騎而馳頓止中野

會天雨雪失身帳所在夜臥草澤中與木華黎張旣裘立

雪中以蔽帝通夕足蹟不移及旦雪深數尺始得免於難

帝與王罕蔑里期之戰亦以風雪迷陣再入敵中求太祖  
不見馬斃敵矢步行奪馬歸則帝已還臥憩車中初帝聞  
博爾朮不歸如失左右手及至喜曰天贊我也時諸部未  
寧遇博爾朮警夜帝寢乃安枕或寓直於內謀謨政事輒  
至達旦丙寅歲太祖卽皇帝位君臣之分益密嘗曰我之  
有博爾朮及木華黎猶車之有轅身之有臂也遂以爲左  
右萬戶各以其屬翊衛位在諸將上太祖征西域畱木華  
黎專任攻金而博爾朮同諸皇子專征天山以南回回諸  
部攻城野戰皆博爾朮運籌其事載籍不詳及太祖自葱  
嶺旋師和林命皇子察合台出鎮回城詔從博爾朮受教  
博爾朮教以人生經涉險阻必獲善地毋以遠涉爲勞山  
谷或藪奸宄所過毋輕舍止防白龍魚服之戒

此傳據開復碑而舊

史剛白龍魚服則博爾朮語不可解  
太祖又何故贊之今據碑文增入  
太祖聞之謂皇子曰

朕之教汝亦不踰是未幾賜廣平路戶萬七千爲分地以  
老病卒大德五年追封廣平王諡忠武子孛樂台襲爵諡  
忠定

玉昔

舊通帖木兒號

博爾朮孫孛樂台子也世祖嘗寵以不名賜

號月呂魯那演猶華言能官也弱冠襲爵統按台部眾撫  
御帖帖世祖聞其賢驛召赴闕器其厯厚解御服銀貂以  
賜時命領大官內膳之職侍宴內殿起行酒詔諸王妃皆  
荅禮焉至元中拜御史大夫時江南既定興利之臣欲援  
金舊制并憲司入漕府而當政者又請以郡府之吏與憲  
司互檢玉昔曰風憲所以糾奸柰何奪監臨之體其議乃  
格遇事正色廷辯世祖每爲霽容至元二十四年宗王乃



顏叛遼東世祖親征至半道玉昔已退敵僵尸覆野數旬之閒三戰三捷獲乃顏以獻詔選乘輿橐駝百蹏勞之乘輿還畱玉昔勦其餘黨復俘金家奴以獻明年乃顏黨哈丹圖魯干復叛再命出師兩遇皆北之追及兩河其眾大衄遁時已盛冬聲言俟春方進乃倍道兼行過黑龍江北擣其巢穴獮薶殆盡哈丹圖魯干逃入高麗海島莫知所終夷其城撫其民而還詔賜內府七寶冠帶加太傅錄軍國重事知樞密院宗王帥臣咸稟命焉特賜步輦入內三十年成宗以皇孫撫軍北邊玉昔輔行請授皇孫以東宮舊璽從之三十二年世祖崩皇孫南還宗室諸王會上都議所立玉昔起謂晉王甘麻剌曰先帝旣授符璽於儲闈太王宗盟之長也奚爲不言於是晉王率宗親大臣合詞

勸進玉昔復坐曰大事已定老臣死且無憾成宗卽位進秩太師賜尙方玉帶寶服還鎮北邊元貞元年冬入朝卒追封廣平王諡貞憲命翰林學士閭復碑其勞伐

阿魯圖博爾朮五世孫也襲職爲怯薛官掌環衛遂拜翰林學士承旨遷知樞密院事後至元三年襲封廣平王至正四年脫脫辭相位薦阿魯圖自代五月詔拜中書右丞相而別怯不花爲左丞相右司郎中陳思謙建言諸事阿魯圖曰左右司之職所以贊助宰相有事面議立見施行何必別陳文字邪郎中若居他官則可建言今居左右司而建言是徒欲顯己名將置我輩何地思謙大慙服一日與僚佐議除刑部尙書宰執有所舉或謂其人柔善不宜掌刑名阿魯圖曰廟堂卽今選劄子邪則須武健人廷尉

者天下之平欲其不枉人不壞法耳先是別怯不花嘗憾脫脫父子謀擠害之阿魯圖不從六年別怯不花乃諷監察御史劾奏阿魯圖不宜居相位阿魯圖卽避出城其姻黨皆爲不平勸令見帝自陳阿魯圖曰我博爾朮世裔豈以丞相爲難得但御史臺乃世祖所設置俾言得失若大臣與御史辯非體也遂罷去明年別怯不花遂爲右丞相力擠脫脫父子然不久亦罷相十一年阿魯圖復起爲太傅出守和林歿無嗣

舊史別傳今移并

紐的該亦博爾朮五世孫也早備宿衛累遷同知樞密院事順帝至元五年奉使宣撫達達之地整理有司不公不法事三十餘條由是朝廷知其才擢知嶺北行樞密院事至正十五年召拜中書平章十七年以太尉總山東諸軍

守鎮東昌路擊退田豐兵十八年田豐復陷濟寧進徧東昌紐的該以乏糧棄城退屯柏鄉東昌遂陷還京師拜中書左丞相力請得太平共事乃令太平同居相位紐的該有識量處事平允倭人攻金復州殺紅軍據其州卽奏遣人往賞賚而安撫之浙西張士誠旣降紐的該處置得宜士誠大服凡授官惟才是選不用私人眾稱其有大臣體已而遽以病罷相謂所知曰太平眞宰相才也我疾固不起而太平亦不能久於位柰何語不及私遂卒

舊史別傳今移并

### 博爾忽

曾孫月赤察爾

博爾忽許兀慎氏主爾乞部人也太祖初年征其部見小兒奇其貌攜歸訶額崙太后養爲己子命太祖弟畜之從征札木合泰赤烏屢立功飲班朮納河水方圍塔爾仇部

時彼部遣死士突圍出至訶額崙太后帳中挾太祖幼子  
拖雷將刃之博爾忽妻阿荅尼從帳出摔賊髮落其刃帳  
下壯士哲伯聞警趨至遂殺賊保全拖雷征王罕時博爾  
忽陷陳深入救出皇子窩闊台吮其矢創疊騎反旣而與  
木華黎等夜斫王罕營克之又與孛羅脫渾征嶺北林木  
中部落孛羅脫渾遇伏死博爾忽獨全師反復偕多爾伯  
申討之盡俘其部歲丙寅太祖卽位幹難河大賚功臣賜  
鐵券免九死封第一千戶爲四怯薛之一世襲其職以上  
秘史怯薛者猶言虎賁親臣也國制分宿衛士爲四番番三  
晝夜總司上之起居飲食服御供奉且警備非常申酉戌  
日博爾忽領之爲第一怯薛博爾忽早歿於陳子尙幼太  
祖命以別速部代攝之而非四傑功臣故太祖自領之號

耶可怯薛蒙古語耶可者大也以天子自領故言第一怯

薛次則亥子丑日博爾朮領之寅卯辰日本華黎領之巳

午未日赤老溫領之赤老溫早歿第四怯薛常以右丞相

代領

以上見兵志其以才任使出將入相者貴盛雖極一

鈔帛億萬計國費由此大耗非初制也世祖至元二十六年詔曰先臣博爾

忽事我太祖無征不從無戰不克

見元明善碑

後從征西夏歿

於敵

見祕史

故與赤老溫晚年戰功皆不著仁宗皇慶中直

學士元明善奉詔撰太師淇陽忠武王月赤察爾碑即博

爾忽之曾孫也於博爾忽亦無事實惟敘其子孫閱閱而

已故舊史雖名立傳與無傳同

舊史博爾忽傳惟事太祖為千戶一語此外皆敘子

孫事蓋全本元明善所撰其孫太師淇陽忠武王碑也

今摭祕史碑志各書補其功業而以子孫附傳於後月赤察爾博爾忽曾孫也初博爾忽戰歿子脫驪襲職從

憲宗四征不庭有拓地功脫驪歿子失列門嗣鎮徼外從征六詔等城亦歿於軍子月赤察爾幼事母以孝聞年十六卽領第四怯薛職世祖至元十七年長第一怯薛明年詔日月赤察爾年雖少忠實敬慎曉暘朝章知無不言可授宣徽使二十六年帝討叛王海都於沆海山眾甫陣月赤察爾奏言臣與丞相安童伯顏御史大夫月呂祿皆世臣今三臣已受命進戰臣不可以後之帝以其祖父皆歿於王事不忍使親行陳止之二十七年桑葛旣立尙書省殺異議者箝天下口以刑爵爲貨紀綱大壞會奉御徹里廷斥桑葛之罪月赤察爾助發其奸桑葛伏誅詔以沒入桑葛金幣田墅分賞旌其直湖廣行省西連洞蠻南接交趾袤數千里上思得賢牧伯鎮撫之月赤察爾舉哈剌合

孫凡任八年威德孚洽入爲賢相世以月赤察爾知人二十八年都水使者郭守敬請鑿渠西導白浮諸水經都城中東達潞河以通江淮舟泊於都外帝亟欲其成又重勞民力敕四怯薛人及諸府人專其役度其高深畫地分賦之刻日畢工月赤察爾率其屬著役服操畚鍤爲倡趨者雲集依限渠成賜名通惠河帝語近臣曰是渠非月赤察爾以身率眾成不速也成宗卽位加太保錄軍國重事樞密宣徽使大德四年拜太師初金山南北爲叛王海都篤哇等所據垂五十年時入爲寇嘗命親王統左右部宗王諸帥屯列大軍備其衝突五年又命月赤察爾副晉王以督之是年海都篤哇入寇分五軍以禦之月赤察爾將其一軍旣交綏頗不利月赤察爾怒被甲持矛身先陷陳一



軍隨之出敵陳背五軍合擊大敗之海都篤哇遁去厥後篤哇來請臣附月赤察爾遣使詣諸王將帥議曰篤哇請降爲我大利若待命於上往返再閱月必失事機人民復困轉輸將士復疲討伐且篤哇妻我弟妹也請先遣使報許而後上聞帝嘉其識機宜由是叛人稍稍來歸十年冬叛王明里等屯於金山武宗帥師出其不意先踰金山月赤察爾以諸軍繼至示以利害明里乃降其部人驚潰月赤察爾遣圖滿帖木爾察忽將萬人深入其部人亦降海都死子察巴爾嗣領其眾至是掩取其兩部十餘萬口至大元年月赤察爾遣使奏曰諸王圖苦蔑本懷攜貳而察巴爾游兵近境叛黨素無悛心倘合謀致死則敗垂成功臣以爲篤哇昔先請和今雖死宜遣使安撫其子款徹

使不我異又諸部歸降牧地不足宜處諸金山之陽而吾軍屯田金山之北軍食既饒又成重成就彼有謀吾已據其腹心矣奏入帝卽命其移軍阿荅罕三撒海地旣而察巴爾圖苦蔑果欲奔款徹不見納遂相率來降於是北邊始靖詔立和林等處行中書省以月赤察爾爲右丞相依前太師錄軍國重事特封淇陽王佩黃金印宗藩將領悉聽進止四年入朝帝宴之於大明殿卒諡忠武

### 赤老溫

曾孫芒哥撒爾

赤老溫泰赤烏部人初太祖微幼時同族泰赤烏忌其英武曰雛雛長大必搏擊人率眾圍之山林九日獲以歸械諸赤老溫之家赤老溫父子憐之每宵輒寬其械會泰赤烏大宴斡難河日暮人散太祖乘守者疏忽著械而遁仰

臥水中惟露其鼻追者不見適赤老溫之父瑣爾罕於月下見之紿散追者使歸而口自語曰無怪人之黠汝而忌汝也速行乎遲終不免矣太祖心德之乃夜尋柝聲往叩其帳赤老溫與其兄沈伯及其妹合荅安共謀匿諸羊毛氈車中翼日泰赤烏大索各帳至其家且索及車其妹合荅安笑曰世有潯暑如斯而臥氈毛中者邪索者舍去瑣爾罕父子資以鞍馬弓矢湏酩宵遣之及太祖起兵勢日盛破泰赤烏之軍追遮其後部得赤老溫一家遂妃其妹而任其兄弟爲宿衛掌親兵南征北伐無不從與木華黎博爾朮博爾忽號掇里班曲律華言四傑也克烈部酋脫里王罕與乃滿部仇殺求援於太祖太祖遣赤老溫與木華黎等四將助之盡殪乃滿兵於按台山下太僕甲仗牛

馬還旣而王罕父子謀襲太祖其下泄謀太祖復遣赤老溫與、華黎等禦之初戰不利日暮收軍惟赤老溫歸營其三傑皆散失詰旦始反明日復遣四將選精銳夜斫其營乃克之旋征乃滿太陽汗大戰滅其國赤老溫父子兄弟竝在行間乃滿旣破太陽汗之兄布魯汗獻女迎降俄復叛去而太陽汗子屈出律亦誘已降之蔑爾吉部叛據阿勒台山太祖令赤老溫之兄沈伯與孛羅渾分攻之而自追屈出律與蔑爾吉酋明春破之於阿來嶺適沈伯亦已攻破阿勒台山寨并破布魯汗於泰寒寨盡屠其眾其戰功與赤老溫相亞太宗元年冬十二月赤老溫帥師圍慶陽金伊刺蒲阿率完顏彝以精兵來救赤老溫解圍去四年攻汴京太宗聞拖雷與金軍相持鈞州急遣赤老溫

與叩溫不華以萬騎趨之乃合攻釣州塹其城外獲金大將完顏合達於土室未知以何年卒

以上采元秘史

赤老溫二子

長朔阿次納圖爾朔阿亦精騎射太祖甚愛之號爲墨爾傑華言善射之尤者也太祖嘗與賊遇將戰有二飛鷺至命朔阿射之朔阿請其雄雌帝曰射其雄者果一發隕其雄賊望見驚曰善射若此飛鳥且不能遁況人乎不戰而走從征乃滿敵率銳兵鼓而進赤老溫父子嚴兵屹不動敵止俄復鼓進亦不動敵疑畏不敢前赤老溫父子突擊大破其眾從太祖征蔑里吉兵潰赤老溫父子兄弟力戰以左右帝會兀良罕哲里馬來援敵乃引退朔阿子那海復事太宗在軍中備歷艱險未嘗形於言太宗嘉其忠且念其世勲旣減金詔封懷州洛陽百七十五戶

以上略本舊史芒哥

撒爾傳但舊史前半敘世系與後半憲宗之詔全不合今以詔書正之詔言赤老溫及子朔阿竝事太祖是朔阿年尚少不應戰功皆屬其子而赤老溫無一事至謂祖孫三世竝曾事烈祖更在太祖之前尤與詔書冰炭又謂朔阿子那海亦事太祖受封洛陽戶口則太祖時洛陽尙爲金有何得遽有封戶蓋舊史誤以太宗平金後事爲太祖事又誤以其祖父孫三世事并歸一朝試觀憲宗之詔止言赤老溫及朔阿父子竝事太祖未嘗言其逮事烈祖又未嘗言其孫那海逮事太祖也舊史種種荒謬致赤老溫無傳無子孫今正之

芒哥撒爾赤老溫之曾孫那海之子也恭謹過其父太宗時從皇弟拖雷攻鳳翔首立奇功定宗時爲斷事官剛明能舉職憲宗在藩邸深知其人從征斡羅思阿速欽察諸部常身先諸將及頒賞所俘寶玉則退然一無所取上益重之使治藩邸之分民間出游獵則掌其軍士動如紀律雖太后及諸嬪御小有過失知無不言邸中咸敬憚之乃詔以爲札魯忽赤乃國制斷事官之長位在三公上猶漢

之大將軍也既拜命出帳殿外敝橐坐熊席其僚列坐左右者四十人芒哥撒爾問曰主上以我長此官當以何道稱此職眾皆默然有夏人和幹居下坐進曰夫札魯忽赤之道猶宰之刲羊也解肩者不使傷其脊在持平而已芒哥撒爾聞之卽起入帳內眾不測其意疑拂於和幹之言既入則爲帝稱和幹之有識帝召和幹命之步曰是可用之才也和幹由是知名定宗崩宗王拔都大會宗親議立憲宗畏兀巴剌欲立皇孫失烈門以先帝曾有遺命爲辭芒哥撒爾折之曰立蒙哥亦太宗遺言也有異議者斬之憲宗既立宗王察合台之子及按赤台等謀作亂剗車轅納兵其中以入轅折兵見克薛傑見之上變芒哥撒爾立發兵迎之按赤台倉卒不能戰遂悉就禽伏誅自是上委

任蓋專奉法不阿多先刑後奏無不報可帝或臥未起芒哥撒爾人至帳前扣箭房奏事輒遙可其奏又賜所御大帳行扇以親寵之癸丑冬病酒而卒芒哥撒爾當國時多嚴誅戮及是咸騰謗言帝乃詔諭其子略曰汝高祖赤老溫愷赤及汝曾祖朔阿事我成吉思皇帝愷赤者官名也某赤又或以官名爲人名如食貨志中昔寶赤入刺哈赤阿塔赤必閣赤貴赤厥列赤八爾赤不魯古赤之類又或連官名於人名如脫里王罕亦都護寶典赤朶赤之類此赤老溫嘗爲愷赤之官因連舉之舊史不知此例故以赤老溫爲無後并不立傳皆著勞烈惟朕皇祖實褒嘉之汝父芒哥撒爾自其幼時事我太宗朝夕左右罔有過咎從我皇考經營四方迨事皇妣及朕兄弟亦罔有過咎暨朕討定斡羅思阿速穩爾別里欽察之域濟大川造方舟伐山通道攻城野戰多於諸將俘厥寶玉大賚諸軍則退然無欲得之



心惟朕言是用修我邦憲治我蒐田輯我國家罔不咸乂  
惟厥忠雖其私親與朕嬪御小有過咎一無比私朝之宿  
衛耆舊無不嚴畏故皇考錄其勲勞命爲札魯忽赤治藩  
邸所受民布昭大公以辨獄愼民爰作朕股肱耳目眾無  
譁言朕聽以安自時厥後察合台阿哈之孫太宗之裔定  
宗闊出之子及其民人越有他志賴天之靈時則有克薛  
傑者以告於朕汝父肅將大旅以遏亂略按赤台等謀是  
用潰悉就拘執朕取有罪者使辨治之汝父體朕之公其  
刑其宥克比於法又使治耶速不里獄亦克比於法惟爾  
脫歡脫爾赤自朕用汝父用法不阿兄弟親姻咸麗於憲  
今爾不怨曰爾亦有死邪若有慊志人則雖死朕將寵  
之如生肆朕訓汝爾克明時朕言如是而有福不如是而

有禍惟天惟君能福禍人惟天惟君是敬是畏其克正直爾身貞絜爾行是汝之福能用朕言則不墜汝父之道人亦不能閒汝不用朕言則人將仇汝伺汝閒汝怨汝父者必曰汝亦與我夷矣汝則殆哉汝於朕言非愼繹之汝則有咎克愼繹之人將敬汝畏汝無或閒伺汝無慢汝怨汝又而母而婦有譏欺巧佞構亂之言愼勿聽之則盡善哉至順四年追封芒哥撒爾克國公子四人長脫歡次脫爾赤次耶先帖木爾次帖木不華脫歡爲萬戶無子脫爾赤子明禮帖木爾累官翰林學士承旨從征乃顏有功帖木不華子伯荅沙幼人宿衛爲寶爾赤歷事成宗武宗仁宗屢官宣徽院使遙授左丞相延祐四年拜中書右丞相英宗時鐵木迭爾執政改授集賢大學士錄軍國重事旋以

太宗正札魯忽赤出鎮北方亦以清靜治邊民泰定閒還朝加太保及文宗初倒刺沙搆兵上都兵潰伯荅沙奉璽紱來上拜太傅仍爲札魯忽赤至順三年卒伯荅沙清慎寬厚號稱長者值國家極盛身事屢朝歿無以殮人服其廉詔贈太師上柱國追封威平王子三八郎其季也期而孤母乞交契氏撫教有法度及長爲太宗正府札魯忽赤能繼其先以上舊史芒哥撒爾傳赤老溫次子納圖爾爲御帳必闍赤繼領衛兵取遼破金屢有功歿於西夏軍中納圖爾生子察刺從太祖征西域以功爲葉里城達魯花赤又事太宗於潛邸立功中原太宗卽位錫金符改授隨州軍民達魯花赤察刺生子忽納襲父職移家郟縣世祖至元十三年以管軍萬戶從丞相伯顏伐宋渡江加金虎符宋平屢

任江西湖東道廉訪使追封陳畱郡侯諡景桓忽納生子  
脫鐵木爾延祐泰定間屢以宣武明威將軍鎮明州越州  
所至褒節孝禮隱逸與賢士大夫琴書觴詠其子孫家邾  
縣世襲東平等處達魯花赤詳黃潛所撰赤遜都臺公墓  
志銘

以上黃文獻集

蓋赤老溫子孫一畱中都一家邾縣雖支庶

屯外者不如中都嫡系顯赫而亦能世其家至正間浙西  
廉訪使月魯不花脫鐵木爾次子也別見忠義傳

論曰博爾忽赤老溫竝列四傑勲冠開國而事不著於史  
然赤老溫父子保全太祖於孤危博爾忽脫睿宗太宗於  
患難所謂王功曰勲已當百世祀況平漠北戰金戰西夏  
援拖雷於河南事功磊磊軒天地乎子孫世衛禁近爲國  
喬木今可攷者尙七世且芒哥撒爾官札魯忽赤位在三

元史卷二十一

列傳

舌

公之上剛正爲一朝之望其憲宗一詔典雅古質幾於命  
詰不知何人所撰詔中明言爾高祖赤老溫愷赤及汝曾  
祖朔阿事我成吉思皇帝無戰不從而舊史兵志翻謂赤  
老溫絕後以本朝之人紀本朝之事荒謬至此烏乎旗常  
鐘鼓之赫鐵券丹書之炳果足恃哉